


Deceemmar

2025



Sekcija Grafički dizajn i novinarstvo



Izuzetan uspjeh naših bivših učenika



Povodom izuzetnih akademskih rezultata, u kabinetu gradonačelnika Sadmira Džebe, danas je upriličen prijem za naše bivše gimnazijalce, Dženanu Delić, studenticu generacije Univerziteta u Tuzli i Eldara Buzadžića, dobitnika Zlatne značke Elektrotehničkog fakulteta Univerziteta u Sarajevu.

Gradonačelnik je tokom prijema razgovarao sa studentima o njihovim dosadašnjim postignućima i budućim planovima, ističući da njihovi uspjesi predstavljaju ponos cijelog grada. Naglasio je da Grad Gračanica prepoznaje i cijeni znanje, rad i upornost te da će im, u skladu sa svojim mogućnostima, uvijek stajati na raspolaganju kao podrška u daljem obrazovanju i profesionalnom razvoju.





Ovom prilikom, gradonačelnik je Dženani i Eldaru uručio simbolične novčane nagrade kao znak zahvalnosti i priznanja za izvanredne rezultate koje su ostvarili, te im uputio iskrene čestitke i želje za mnogo uspjeha u budućem radu.



**“Vi ste najbolji ambasadori
Gračanice i dokaz da naš grad ima
svijetlu budućnost”, poručeno je
sa prijema.**




MEĐUNARODNI DAN BORBE PROTIV AIDS-A


1. DECEMBAR 2025

01. decembar u svijetu se obilježava kao „Međunarodni dan borbe protiv AIDS-a“.

Cilj obilježavanja ovog datuma jeste podizanje svijesti o važnosti očuvanja zdravlja, posebnostima zaraze HIV virusom, dostupnosti liječenja antiretrovirusnim lijekovima te prevenciji HIV infekcije. Učenici IIIc razreda su na času odjeljske zajednice obilježili ovaj važan datum. Pripremili su prezentaciju na temu „AIDS“, nakon čega su imali priliku da kroz učešće u kvizu pokažu koliko su naučili o ovoj temi. Također su snimili i poučne video isječke, koje su pripremili u sklopu radionice.

Mentor učenicima bila je Samira Mejremić, prof. biologije.







**OBILJEŽAVANJE DANA
BORBE PROTIV NASILJA
NAD ŽENAMA I 16 DANA
AKTIVIZMA**

JUČER SU VIJEĆE UČENIKA, IZBORNA NASTAVA SOCIOLOGIJA I PROFESORICA FAHIRA I NAŠA DRAGA SONJA PEROVIĆ, PSIHOLOG U CENTRU ZA MENTALNO ZDRAVLJE DOMA ZDRAVLJA GRAČANICA ODRŽALI PREDAVANJE I RAZGOVOR NA TEMU 'RODNO ZASNOVANOG NASILJA', A POVODOM OBILJEŽAVANJA DANA BORBE PROTIV NASILJA NAD ŽENAMA I 16 DANA AKTIVIZMA.

**PORED TOGA ŽELIMO SE POHVALITI NAŠOM BIVŠOM UČENICOM, AIDA MEŠIĆ - ATELJE AIDA KOJA JE SVOJOM KREACIJOM NA MODNOJ REVII NA @BHFASHIONWEEK UČESTVOVALA KREACIJOM U KAMPANJI PROTIV FEMICIDA "UDRUŽENE PROTIV NASILJA NAD ŽENAMA" .
PREVENCIJA JE UVIJEK IN!**



Aida Mešić

prije 1 dan/a · 🌐

Hrabrost u pokretu.

U svijetu gdje se sjene razlete prije istine, žena stoji mirno-svjedok svoje slobode.

Ponosno dijelim da je @merima_maki u okviru 49. @bhfashionweeksarajevo nosila moju posebno dizajniranu kreaciju u kampanji protiv femicida "Udružene protiv nasilja nad ženama".

Cilj ove kampanje je edukacija i podizanje svijesti o prevenciji nasilja, posebno digitalnog, kojem je izloženo sve više žena i djevojčica.

Tokom #16Dana postavlja se ključno pitanje: Kako osnažiti žene i djevojčice, unaprijediti zaštitu i učiniti digitalni prostor mjestom slobode, a ne straha?

Ponosna sam što sam dio projekta koji govori u ime svih onih čiji se glas često ne čuje. ❤️



NAŠA UČENICA LEJLA VRŠAJEVIĆ PONOVO BRILJIRALA NA TURNIRU U ŠAHU

Na Memorijalnom turniru "Sjećanje na Avdu Zulića" u Tojšićima (Kalesija) održanom u nedjelju 30.11. gdje je nastupilo 94 igrača, svoje šahovsko umijeće su pokazali i gračanički šahisti.

Povratnik, kadet Emin Osmanhodžić sa osvojenih 4 boda i 28 rejting bodova puno obećava u klubu. Mirza Vršajević, takođe 4 osvojena boda i pomak sa 56.startne pozicije na 53.mjesto. Fadil Subašić sa osvojenih 5 bodova je obezbijedio 32.mjesto.

Šlag svakako dolazi na kraju. U ovom slučaju radi se o najboljima i to Lejli Vršajević. Lejla je osvojila 3,5 boda i to joj je omogućilo da bude najbolje plasirana žena na turniru. Ovo je još jedan dokaz da dobar rezultat u Makarskoj i prvo mjesto među kadetkinjama do 17 godina na turniru u Gračanici nisu slučajnost. Da li je na pomolu nova zvijezda ženskog šaha u Gračanici, pored Merjem Džafić, ostaje da se vidi?





GRADSKO TAKMIČENJE IZ ODBOJKE

Danas 03.12.2025 godine održano je gradsko takmičenje iz odbojke za Srednje škole grada Gračanica. Takmičenje se održalo u PSKC Bazen u organizaciji Sportskog saveza, Gimnazije dr. "Mustafa Kamarić" i MSŠ. Takmičenje je prošlo u sportskom duhu i druženju Srednjih škola našeg grada. Učenice i učenici Gimnazije osvojili su drugo mjesto a voditelji ekipa su bili profesorica Jasmila Halilović Žuna i profesor Čekmić Muris.



Laila Isić Ila

FUTURA IZLOŽBA

U galeriji BKC-a postavljena je izložba kreativnih radova "Futura i prijatelji". Naši učenici drugih razreda opće i IT gimnazije u pratnji profesorice Alme Mujkić, Eniza Hukića i Jasmina Ahmetovića posjetili su sajam kreativnih radova.



Udruženje roditelja djece i mladih sa invaliditetom "Futura" na ovaj način sa svojim prijateljskim udruženjima, organizacijama, ustanovama te školama sa područja Gračanice, obilježavaju Međunarodni dan osoba sa invaliditetom. Ovaj dan je dobar povod da se skrene pažnja na probleme sa kojima se susreću osobe sa invaliditetom i njihove porodice.



Laila Isić Ila

KVIZ OPĆEG ZNANJA

Danas je održano Školsko timsko takmičenje u općem znanju učenika naše škole. Znanje je odmjerilo 11 ekipa koje su pokazale najbolji rezultat na razrednim takmičenjima kao i 1 ekskluzivna ekipa sastavljena od učenika iz više razreda. Takmičenje se sastojala od 5 krugova, 3 kruga putem Wayground: jezici, STEM i trivia i 2 kruga putem Kahoot kviza. Putem Waygrounda, kviz je vodio Nedžad Husićić a putem Kahoot Kenan Mustafičić, koji vodi i pub kvizove u Gračanici.



Najbolji rezultat je pokazala upravo ekskluzivna ekipa koja inače učestvuje u pub kvizovima ali je na ovom takmičenju bila samo gost. Ekipu su činili Adnan Hajdić, Ervin Iljazović i Ajdin Karić. U regularnom dijelu koji se odnosi na ekipe koje su najbolji predstavnici svog razreda, tri najbolja rezultata su:

1.mjesto IVb (Hasan Hasić, Sara Ćudić i Esmā Mekić)

2.mjesto IIIb (Tarik Ademović, Operhal Aleks i Hajrudin Delić)

3.mjesto IIIa (Medina Nukić, Orhan Halidović i Nadina Slamnik)

Zahvaljujemo se svim učesnicima na takmičenju a velike pohvale najboljim.



Amra Mešanović Ila

Obilježjen 10. decembar Dan ljudskih prava

15.12.2025 13:41

Povodom obilježavanja Dana ljudskih prava, 10. decembra, učenici II razreda pripremili su animirani video (Kenan Buljubašić i Davud Mejremić), prezentaciju s naglaskom na prava sadržana u Općoj deklaraciji o ljudskim pravima (Amra Mešanović), kviz o ljudskim pravima (Adis Jašarević) te prigodne plakate izložene na holu škole (Dženita Karić).






Obilježen 20. decembar ***Dan borbe protiv pušenja***

Pušenje među mladima predstavlja ozbiljan problem jer često počinje iz radoznalosti, pritiska vršnjaka ili želje za pripadanjem grupi, što ih može uvesti u dugogodišnju ovisnost.

Poseban problem danas predstavlja snus, bezdimni duhanski proizvod, najčešće u obliku sitnih vrećica koje se stavljaju između gornje usne i desni.

Također sadrži nikotin i stvara ovisnost.

Učenica Dženita Mešanović nacrtala je plakat na kojem je prikazala kako duhanski dim dovodi do uništavanja ljudskog organizma, gubitka zdravlja te stvaranja ovisnosti.




Inače 20. decembar obilježava se kao Dan borbe protiv pušenja. Učenici III razreda izborne nastave, s ciljem obilježavanja ovog datuma u školi, pripremili su niz aktivnosti na temu „Konzumacija nikotina među mladima“.



Mentor učenicima je profesorica biologije Samira Mejremić.



Ajrun, Hamza i Davud uradili su prezentaciju na temu „Štetnost pušenja“. Učenice IV razreda izborne nastave, Anela i Segmedina, izradile su poster o djelovanju konzumiranja nikotina na zdravlje.



BORBE PROTIV PUŠENJA 20. DECEMBAR

dan borbe protiv pušenja... 20. decembra... javnozdravstvena kampanja... podizanja svijesti o štetnosti... potrebe duhanskih proizvoda, ali i o manipulativnim taktikama kojima se koristi duhanska industrija.

Pušenje je bolest zavisnosti i jedan od najvećih javnozdravstvenih problema u svijetu. Najveći je pojedinačni preventabilni uzrok prerane smrti, bolesti i nesposobnosti.

Pušenje je glavni uzrok raka pluća, ali i raka usta, grla i drugih organa. Toksične supstance iz cigareta ulaze u tijelo i godinama uništavaju ćelije, često bez ikakvih simptoma.

Kada se bolest otkrije, u mnogim slučajevima već je kasno. Rak uzrokovan pušenjem često završava dugotrajnim liječenjem, jakim bolovima i smrću.

Redovno pušenje trajno oštećuje pluća i dovodi do hronične opstruktivne bolesti pluća (COPD). Osobe s ovom bolešću osjećaju stalno gušenje, kratak dah i umor čak i pri najmanjem naporu.

Pluća se više ne mogu oporaviti, a oboljeli često završe vezani za boce s kisikom do kraja života.

Hemikalije iz cigareta sužavaju krvne sudove i oštećuju srce. Zbog toga pušači imaju mnogo veći rizik od srčanog i moždanog udara, koji se mogu desiti iznenada i bez upozorenja. Posljedice mogu biti trajna nepokretnost, oštećenje mozga ili smrt, čak i kod mladih ljudi.

Korištenje nikotina u adolescenciji može naštetiti dijelovima mozga koji kontroliraju pažnju, učenje, raspoloženje i kontrolu impulsa.

Svaka popušena cigareta skraćuje život za oko 15 minuta; pušači u prosjeku žive 10-15 godina kraće.

Prema procjenama Svjetske zdravstvene organizacije, svake godine umire više od 6 milijuna ljudi zbog neposrednog pušenja, a 890.000 zbog pasivnog pušenja.

Kontrola i prevencija pušenja su najvažnije mjere za zaštitu zdravlja i smanjenje troškova liječenja.

Jaka želja za cigaretom traje 3 minute, nikada dulje, a možete je suzbiti tako da operete zube, prošetate, popijete čašu vode ili pojedete neko voće. Prestanak pušenja je najveći korak koji možete učiniti prema zdravom životu.

BRINI O SEBI I DRUGIMA!

Anela Selimović
Segmedina Badžić
uz mentorstvo prof. Samire Mejren

NAŠA DVA UČENIKA POZVANA NA OKUPLJANJE RUKOMETNE KADETSKE REPREZENTACIJE

Naši učenici svaki dan pored školskih obaveza ulažu svoje slobodno vrijeme i u vanškolske aktivnosti.

I naravno, nagrada za trud i rad se prepoznaju.


Naši Adnan Salkić i Harun Čatal su pozvani na okupljanje rukometne kadetske reprezentacije 27.12.2025.godine.

Adnanu želimo puno sportske sreće i uspjeha u subotu, a Harunu brz i uspješan oporavak od povrede.

AKCIJU "JEDAN SLATKIŠ, JEDNO DIJETE"

Vijeće učenika Gimnazije "Dr. Mustafa Kamarić" je u akciji "Jedan slatkiš, jedno dijete", pored podjele slatkiša i paketića u centru grada, podijelilo i 50 paketića za djecu na odjeljenju pedijatrije Opće bolnice "Mustafa Beganović" Gračanica i odjeljenju pedijatrije Doma zdravlja Gračanica, te nekoliko paketića za djecu u obdaništu i osnovnim školama na području grada.





Kreativni rad hemičara




Učenici izborne nastave III i IV razreda, zajedno s učenicima prvog razreda, u susret nadolazećoj Novoj godini izradili su kreativnu jelku koristeći laboratorijsko posuđe i hemikalije.

Drugu jelku su napravili od papira, a poseban naglasak stavljen je na primjenu homolognog niza alkana, čime je spojena teorija i praksa na zanimljiv i edukativan način.

Aktivnost je realizovana uz mentorstvo prof. Jasminke Nurkanović.



26. decembar 2025. 15:56



30. decembar 2025. 09:19